

Na osnovu člana 5. stav (1) tačka h) i člana 19. stav (1) tačka c) Zakona o Agenciji za bankarstvo Federacije Bosne i Hercegovine ("Službene novine Federacije BiH", broj: 75/17) i čl. 104. i 248. Zakona o bankama ("Službene novine Federacije BiH", broj: 27/17), Upravni odbor Agencije za bankarstvo Federacije Bosne i Hercegovine, na sjednici održanoj 13.10.2017. godine donosi

ODLUKU O IZUZECIMA OD ČUVANJA BANKARSKE TAJNE

Član 1.

Ovom odlukom se bliže propisuje postupak davanja podataka o klijentu banke trećim licima, a na osnovu pisane saglasnosti klijenta na kojeg se ti podaci odnose, kao i kada se podaci daju licu osnovanom radi prikupljanja podataka o iznosu, vrsti i ažurnosti ispunjavanja obaveza fizičkih i pravnih lica koja koriste bankarske usluge i razmjene ovih podataka između banaka i između banaka i lica u finansijskom sektoru (kreditni biro), u skladu sa posebnim zakonom i drugim propisima, odnosno pod uslovima predviđenim sporazumom o saradnji zaključenim između banaka i tog lica.

Član 2.

- (1) Obaveza čuvanja bankarske tajne ne postoji ako se podaci o klijentu saopćavaju trećem licu uz pisanu saglasnost klijenta na koga se podatak odnosi.
- (2) Pisana saglasnost mora sadržavati svrhu, rok do kada se podaci mogu koristiti i jasno naznačenu vrstu podatka koji se traže te ista mora biti ovjerena ili potpisana pred službenikom banke.

Član 3.

Prilikom razmjene podataka na osnovu pisane saglasnosti klijenta na kojeg se ti podaci odnose, banka je dužna da ispuni sljedeće uslove:

- a) osigura da su podaci koji se dostavljaju tačni, potpuni i ažurirani,
- b) klijentu na njegov zahtjev omogućiti uvid u njegove podatke koje banka dostavlja,
- c) osigura da se tom prilikom ne razmjenjuju podaci u većem obimu nego što je potrebno za namjenu za koju se razmjenjuju i
- d) čuva primljene podatke do roka koji je potreban za svrhu u koju se podaci dostavljaju.

Član 4.

- (1) Banka može bez pisane i ovjerene saglasnosti klijenta dati podatke o klijentu nakon njegove smrti isključivo zakonskim nasljednicima, postupajući po zahtjevu suda ili notara kojem je odlukom suda povjereno vođenje ostavinskog postupka iza umrlog lica.
- (2) Notar koji vodi ostavinski postupak kao povjerenik suda može tražiti od banke podatke o umrlom klijentu, ali je u obavezi da banci dostavi odluku suda kojem mu se povjerava vođenje ostavinskog postupka iza umrlog lica.
- (3) Kada se banci obrate zakonski nasljednici zahtjevom kojim traže dostavljanje podataka o umrlom klijentu potrebno je da banci dostave rješenje o nasljeđivanju kojim dokazuju status zakonskih nasljednika.

Član 5.

Nakon što se banci obrate lica iz člana 4. ove odluke, te banci dostave potrebnu dokumentaciju kojom dokazuju valjan pravni osnov svog traženja podataka iza umrlog klijenta, banka je u

obavezi da postupi po njihovom traženju te da im dostavi potrebne podatke koji se mogu koristiti isključivo u svrhe postupka koji se vodi iza umrlog lica.

Član 6.

Ova odluka stupa na snagu osam dana od dana objavljivanja u "Službenim novinama Federacije BiH".

Broj: U.O.-08-16/17
Sarajevo, 13.10.2017. godine

PREDSJEDNICA
UPRAVNOG ODBORA

mr. sc. Ljerka Marić, dipl.ecc., s.r.